



貧士傳目錄

卷之上

披裘公

老萊子

榮啓期

春秋三子

鮑焦

齊餓者

黔婁先生

北郭騷

仲尼三弟子

河上貧者

子桑子

列禦寇

莊周

鶡冠子

顏觸

陳仲

王高

宋勝之

張仲蔚

向長

孫期

南京圖書館藏

閔貢

婁壽

郭太

符融

申屠蟠

徐氏父子

卷之下

庖累

寒貧

孫登

董京

夏統

郭文

郭翻

沈道虔

孔淳之

翟法賜

劉凝之

朱百年

顧歡

吳蔡二隱

徐百珍

沈麟士

沈顛

阮孝緒

劉訐

胡叟

范元琰

朱桃椎

孟浩然

高繹

杜生

俞澹

賈收

丁時習

蘇雲卿

蘇扶

何溥

周方叔

呂徽之

胡汲仲

杜有開

張介福

王逵

王賓

邢量

貧士傳目錄終

貧士傳卷之上

吳門黃壽丘撰

嘉禾周履靖校

金陵書林梓行

披裘公

披裘公者吳人也延陵季子出遊見路有遺金  
公當夏五月披羊裘負薪而過之季子呼公取  
焉公投鎌於地瞑目拂手而言曰子何居之高  
而視之下貌之君子而言之野也吾五月披裘

而負薪豈取遺金者哉季子知其爲賢者請問  
姓字公曰吾子皮相之士何足語姓字也遂去  
季子立而望之不見乃止

札也行國 公邁中達 食薪力負

冬裘夏披 黃金可拾 素操豈移

秘名飄往 佇覽莫追

### 老萊子

老萊子者楚人也當世亂逃耕蒙山之陽墻以  
莞葭室以蓬蒿牀以枝木席以著艾水飲菽食

墾山播種蕭然世表也楚王駕先其門當萊子  
織畚而言曰守國之政孤願煩先生萊子許之  
其妻曰妾聞酒肉我者可鞭捶我官祿我者可  
鈇鉞我妾詎能爲人所制哉遂投其畚而去萊  
子亦隨至於江南而止曰鳥獸之毛可績而衣  
其遺粒足食也仲尼嘗蹙然改容于斯言

老萊鴻翼 蒙中耕處 草木邊遊

水菽啜咬 綠闥陳謨 朱方偕底

績毛食粒 蹙容宣父

榮啓期

榮啓期者周時人也值衰世隱居窮處遺物求  
 已時被裘帶索行吟於路曰吾著裘者何求帶  
 索者何索嘗鼓琴而歌孔子過之問曰先生何  
 樂曰吾樂有三天生萬物唯人為貴而吾得為  
 人以男為貴而吾得為男或皆不免於襁裸而  
 吾行年九十矣是三樂也夫貧者士之常也死  
 者命之終也居常待終當何憂乎孔子聽其語  
 為之三日悲焉

啓期至素

拒外抱中

以教舒詠

因服表衷

志揚舜絃

詞慨尼聰

三樂弗諼

一丘固窮

春秋三子

春秋三子者楚之交子魯之周子齊之狂子也  
 三子生當衰世之季目覩王綱之斁思欲絕景  
 雲表濯志溟津乃相與居泰山之陽處環堵之  
 室葺戶不扉蓋茨不翳而高歌不輟君子謂可  
 方之倪缺云

殊方三子 同道一心 蜩視姬邦

鳳遠泰岑 作幾舉色 舍和保真

豈謂陋栖 廢厥高吟

鮑焦

鮑焦者不知何許人也衣敝膚見挈畚持蔬遇子貢於道子貢曰吾子何以至於此也焦曰天下之遺德教者衆矣吾何以不至於此也吾聞之世不已知而行之瘁行也上不已用而干之毀廉也瘁行毀廉然且弗舍惑於利者也子貢

曰吾聞之非其世者不生其利汚其君者不履其土非其世而持其蔬詩曰溥天之下莫非王土此誰有之哉焦曰於戲吾聞賢者重進而輕退廉者易愧而輕死於是棄其蔬而立槁於洛水之上

於烈鮑焦 躑步周行 耻辰叔季

結想上皇 晤賜啓言 投蔬立僵

孤潔名流 洛水竝長

齊餓者

齊餓者不知何姓字也齊大饑黔敖爲食於路  
以待餓人有蒙袂輯屨貿貿然來者敖左奉食  
右執飲曰嗟來食迺揚目而視之曰予唯不食  
嗟來之食以至於斯也從而謝焉終不食而死  
曾子聞之曰其嗟也可去其謝也可食

淄境荐凶 敖也設食 槁瘁有來

虛餓孔棘 呼嗟致聲 舉瞳作色

簞豆終揮 含餒甘沒

黔婁先生

黔婁先生魯人也脩身清節不求進於諸侯魯  
公以鍾粟辟爲相齊王以黃金聘爲卿俱辭不  
就著書四篇抱潔而死曾子與門人往弔之上  
堂見先生之尸在牖下枕墜席藁楹袍不表覆  
以布被手足不盡斂覆頭則足見覆足則頭見  
曾子曰斜引其被則斂矣妻曰斜而有餘不如  
正而不足也先生以不斜之故能至於此生而  
不斜死而斜之非先生意也曾子不能應遂哭  
之曰嗟乎先生之終也何以爲謚妻曰以康乎



曾子曰先生在時食不充口衣不蓋形死則手足不斂旁無酒肉何樂於此而謚爲康耶妻曰否否先生者之生也甘天下之淡味安天下之卑位不戚戚於貧賤不忻忻於富貴求仁得仁求義得義其斯可謚爲康也已曾子喟然嘆曰惟斯人也而有斯婦

有穆先生

正以矩身

祿辭兩國

室乏兼辰

缺斂曾惻

撝謚妻陳

存雖苦節

畢乃康名

### 北郭騷

北郭騷者齊人也結杲杲捆蒲葦織屨履以養其母猶不足踵門見晏子曰願乞所以養母晏子之僕謂晏子曰此齊國之賢者也其義不臣乎天子不友乎諸侯於利不苟取於害不苟免今乞所以養母是說夫子之義也必與之晏子使人分倉粟府金遺之辭金而受粟有間晏子見疑於君出奔北郭子曰吾聞之養及其親者身伉其難於是以身死白之

騷尚蠱盤

銖塵晉寵

毋簋莫充

相門斯踵

銜惠何深

酬身忻悃

取不賊廉

死非傷勇

### 仲尼三弟子

仲尼三弟子者顏回曾參原憲也回常簞食瓢飲處於陋巷人不堪其憂不改其樂孔子賢之他日嘗列弟子之行又曰回也其庶乎屢空及回死無以葬厥父顏路請孔子之車以爲槨云參不仕居衛緼袍無表顏色種噲手足胼胝三

日不舉火十年不製衣正冠而纓絕捉衿而肘見納履而踵決曳縱而歌天子不得臣諸侯不得友而卒傳孔子之道憲居以環堵茨以生草蓬戶不完桑木爲樞而甕牖二室褐以爲塞上漏下濕匡坐而絃歌子貢盛服軒車往見原憲憲韋冠縱履杖藜應門子貢曰先生病矣憲應之曰憲聞無財之謂貧學道不能之謂病若憲貧也非病也子貢逡巡而退有愧色

素王樂天 水飲疏飯 道鑄三賢

器同一範 乃回幾化 乃參聞貫  
彼不受命 曷知貧憲

河上貧者

河上貧者宋人也家貧緯蕭而食其子沒於淵  
得千金之珠貧者謂其子曰取石來鍛之夫千  
金之珠必在九重之淵而驪龍領下子能得珠  
者必遭其睡也使驪龍而寤子尚奚微之有哉  
君子謂其不以貧而苟得焉

宋有玄人 希微澹寂 溯澗幽盤

織葭聊食 厥嗣淵投 月珠乃獲

量龍作戒 碎糜它石

子桑子

子桑子者不知何許人也子輿與之友霖雨十  
日子輿恐其病也裹飯而往食之至子桑之門  
則若歌若哭鼓琴曰父邪母邪天乎人乎有不  
任其聲而趨舉其詩焉子輿入日子之歌詩何  
故若是曰吾思夫使我至此極者而弗得也父  
母豈欲我貧哉天地豈私貧我哉求其為之者

而弗得也然而至此極者命也夫

桑也居困 輿寔良朋 浹旬病雨

一飯造門 歌絃甫奏 思故方深

究之莫得 歸彼生辰

### 列禦寇

列禦寇者鄭人也穆公時子陽爲相專任刑法禦寇乃絕迹窮巷面有饑色或告子陽曰列禦寇有道之士居君之國而窮君無乃不好士乎子陽與粟數十乘禦寇見使辭之其妻望之而

拊心曰妾聞爲有道者之妻皆得佚樂今有饑色君過而遺先生食不受非命也哉禦寇笑曰君非自知我也以人之言而遺我粟至其罪我也又且以人之言居一年子陽與其黨皆見殺禦寇獨全著書八篇曰列子

鄭圃列子 壺丘是師 刑名山霽

清謐女饑 彼以人饋 我以身辭

垂言窮巷 世仰沖虛

### 莊周

莊周者宋之蒙人也家貧往貸粟於監河侯監河侯曰諾我將得邑金將貸子以三百金可乎莊周忿然作色曰周昨來有中道而呼者周顧視車轍中有鮒魚焉周問之曰鮒魚來子何爲者耶對曰我東海之波臣也君豈有斗升之水而活我哉周曰諾哉且南遊吳越之王激西江之水而迎子可乎鮒魚忿然作色曰吾失我常與我無所處吾得斗升之水然活耳君乃言此曾不如早索我於枯魚之肆著書內外篇不仕

而終

莊生知樂

漆園曠逸

郊犧不爲

塗龜自厄

假粟監河

誇金三百

達言罕譬

秩有倫脊

鵲冠子

鵲冠子者楚人也隱居幽山衣敝履空以鵲爲冠莫測其名因服成號著書言道家用馮諼常師事之後顯於趙鵲冠子懼其薦已也乃與諼絕終身不仕

荆有哲靈 幽巖芳蹈 服不周形  
冠因作號 赤縣隱名 丹書闡道  
有勿陟顯 斥交終操

顏觸

顏觸者齊人也居齊下邑宣王致見與語以爲君子也願請受爲弟子觸曰玉生於山制則破焉非弗寶貴矣然而大璞不完士生乎鄙野推選則祿焉非不尊遂也然而形神不全觸雖貧晚食以當肉安步以當車無罪以當貴清淨貞

正以自娛悅而已因再拜辭去君子曰觸知足矣終身不辱

觸居側邑 明挂齊宣 侯師雖顯

山玉弗完 至道一陳 鄙邑言旋

貞樸無願 君子頌焉

陳仲

陳仲字子終齊人也其兄戴爲齊卿食祿萬鍾仲以爲不義嘗殺饋鶩與食出而哇之將妻子適楚居於陵自謂於陵仲子窮不苟求食不非

義遭歲飢乏糧三日乃匍匐而取井上李食之  
蟲者三咽而能視聽身織屨妻辟纊以易衣食  
楚王遣使持金欲聘為相其妻曰亂世多害恐  
先生不保也遂相與逃去為人灌園

子終蚓操

於陵自竄

鶩哇兄饋

李充蠮半

乃屨乃纊

乃衣乃爨

楚患內規

高潛園灌

王高

王高者秦時人也當秦末饑亂父母兄弟死者

十有五人家貧徒壁立夫婦晝則傭耕夜則伐  
草燒博饑食藜藿寒衣草衣而夫婦安然不變  
所守焉

高生不辰

會秦鹿失

犖然匹婦

罄爾四壁

晝耨夕薪

草衣藿食

素患與貧

而無戚戚

宋勝之

宋勝之者南陽安衆人也少孤居穀城聚中孝  
慕甚薦聚中化之少長有禮家貧不能自贍乃

依食姊家數歲往受易長安以信義稱從兄裒  
爲東平內史遣使招之勝之曰衆人所樂者非  
勝之願也乃去太原從郇越牧羊以琴書自娛  
丞相孔光就太原辟之不至

勝之德淳 至孝作人 姊食從寄

兄爵蔑輕 樂游郇囿 耻就孔勲

絃策綜玩 展也鴻生

### 張仲蔚

張仲蔚者平陵人也閉門養性不治榮名與同

郡魏景卿俱修道德隱身不仕明天官博物善  
屬文好詩賦常居窮素所處蓬蒿没人時人莫  
識唯劉龔知之

仲蔚削智 繕世自陶 玄珠則保

浮名弗饗 采椽惟何 惟蓬與蒿

獨彼劉魏 雅素締交

### 向長

向長字子平河內人也性尚中和好通老易貧  
無資食好事者更饋焉受之取足而返其餘潛



隱於家讀易至損益卦喟然歎曰吾已知富不如貧貴不如賤但未知死何如生耳建武中與同好北海禽慶俱遊五岳名山不知所終

向子委順 榛莽屏居 食淡每匱

受鬻返餘 潜玩微象 暢契玄知

綠海携友 名岳偕歸

### 孫期

孫期字仲或濟陰武城人也習京氏易古文尚書家貧不仕事母至孝獲膳莫供乃於大澤中

牧豕以資奉養遠人從學者皆執經壠畔黃巾賊起適期里陌輒相勅約曰莫犯孫先生舍司徒黃琬特辟之不行終于家

期也居約 職共爲子 乃從兌澤

牧厥姤豕 青衿考質 芳壠詔語

德懷蠹寇 名徵天府

### 閔貢

閔貢字仲叔太原人也世稱節士雖以周黨之潔清自以弗及也黨見仲叔食無菜遺之生蒜

仲叔曰我欲省煩耳今更作煩耶受而弗食建武中司徒侯霸既辟至投劾而去復以博士徵不至客居安邑老病家貧不能得肉日買猪肝一片屠者或不肯與令聞勅吏常給焉仲叔怪問知之乃嘆曰閔仲叔豈以口腹累安邑耶遂去客沛以壽終

清矣仲叔

廉節輿推

友饋弗嘗

公聘再辭

皤顛在旅

鮮食莫需

潔躬徙沛

卒老于斯

### 梁鴻

梁鴻字伯鸞扶風平陵人也鴻幼遭亂父卒卷席而葬受業太學家貧厲節學畢牧豕於上林苑中誤遺火延及它舍悉以豕償其主猶以爲少鴻無它財以身居作後聘同縣孟光入門不荅乃更椎髻布衣操作而前乃喜曰此真梁鴻妻也有頃共入霸陵山中以耕織爲業復至吳居臯伯通廡下爲人賃舂每歸孟光具食舉案齊眉伯通知非凡人乃舍之於家鴻潛閉著書

既卒伯通等爲塋于要離冢傍

伯鸞清白 幼遭屯極 惟皇作合

彼美令德 力耕陵山 爲春吳國

良彥偕心 烈士並域

張楷

張楷字公超不知何郡人也治嚴氏春秋古文尚書就學車馬填門貴戚之家皆起舍巷以候過客之利楷疾其如此輒徙避之家貧無以爲業常乘驢車至縣賣藥足給食輒還鄉里

公超克學 融博古經 簪從旣廣

鵠徙何深 花邑時駕 玉壺永春

優游郊里 忘厥處貧

孔嵩

孔嵩字仲山南陽人也家貧親老乃變姓名傭爲新野里街卒友人范式行部到新野而縣選嵩爲導騶迎式式見而識之呼嵩把臂曰子非孔仲山耶對之嘆息語及平生曰共與俱叟長裾遊集帝學吾蒙國恩致位牧伯而子懷道隱

身處於卒伍不亦惜乎嵩曰昔侯嬴長守於賤業晨門肆志於抱關子居九夷不患其陋貧者士之宜豈爲鄙哉式勅縣令代嵩嵩以爲先傭未竟不肯去

嗟爾仲山

淪賤攻苦

才成國器

氓編邑伍

騶候新郊

節逢故與

握手論交

報言援古

吳祐

吳祐者不知何地人也年二十喪父居無擔石

而不受贍遺常牧豕於長垣澤中行吟經書遇父故人謂之曰卿二千石子而自業賤事縱子無耻柰先君何祐辭謝而已守志如初

祐方弱冠

卽抱莪悲

匱却將贈

牧諷典書

父交相邁

忝生載規

人各有心

厥志莫移

婁壽

婁壽字元考南陽隆人也孩童岐嶷有志挽髮傳業好學不厭榮沮溺之耦耕甘山林之杳藹

遲夷衡門樂以忘憂郡縣禮請終不回顧粗絺  
大布之衣糲糶蔬菜之食蓬戶茅宇捲樞龕牖  
樂天知命確乎其不可拔也是以守道識貞之  
事高尚其事年七十八卒國人相與論德處謚  
曰玄儒先生

元考純叟

性澄不誘

敦志星帷

減景雲藪

在歎克熙

于天宜者

玄儒國謚

懿述弗朽

郭太

郭太字林宗太原人也少事父母以孝聞家貧  
郡縣欲以爲吏歎曰丈夫何能執鞭斗筲哉乃  
欲遊學無資就姊夫貸錢五千與同縣宗仲至  
京師從屈伯彥學春秋併日而食衣不蔽形常  
以蓋幅自障出入入則蔽前出則掩後以母喪  
歸凡司徒辟太常趙典舉有道皆不就以建寧  
二年卒

懿哉林宗

胥史豈羈

遐追聖學

言邁王畿

蛾習典學

麟獲授書

奔哀歸處 藏器棲遲

### 符融

符融字偉明陳留浚儀人也州郡禮請孝廉連辟皆不應會黨事妻亡貧無殯歛潁川張元祖來存融推所乘羸車牛欲爲具棺服融不肯受曰古之亡者棄之中野唯妻子可以行志但卽土埋藏而已與同郡田盛郭林宗並不仕以終云

偉明逸韻 抗道虬盤 婦亡無歛

友欲備棺 乃行古志 青野埋捐

同襟皆逝 用晦林泉

### 申屠蟠

申屠蟠字子龍陳留外黃人也家貧傭爲漆工郭林宗見而奇之少有名節鄉人稱焉父母卒哀毀思慕遂隱居學治京氏易嚴氏春秋小戴禮因博貫五經兼明圖緯前後凡蒲車特徵皆不就年七十四以壽終

恬曠子龍 被褐處空 冲心玄境

污跡傭工 瞻依蚤失 經緯咸通

蒲纁數返 考命以終

### 徐氏父子

徐穉字孺子豫章南昌人也讀書豐城楮山之  
厓家貧常自耕稼非其力不食恭儉義讓所居  
服其德常齎磨鏡具到所住傭以自給桓帝以  
玄纁備禮徵聘陳蕃胡廣黃瓊交辟不就靈帝  
欲蒲輪聘穉會卒時年七十二子胤字季登隱  
居不仕躬行稼穡倦則誦經貧窶困乏執志彌

篤不受惠於人太守華歆禮請相見辭疾不詣  
建安中卒

孺子者何 挺生杰出 田耕止共

鑑磨行給 臣僉檄求 帝兩旌辟

子胤不承 足昭先德

貧士傳卷之上

終

貧士傳卷之下

吳門黃壽丘撰

嘉禾周履靖校

金陵書林梓行

庖

庖累字伯重京兆人也遭亂播遷徙鄴喪婦乃  
詣洛陽遂不復娶獨居道側以甌甑為障施一  
厨床食宿其中晝日潛思夜則仰視星宿吟詠  
不輟衣緼敝服嘉平中縣令閔其孤老給廩不

金陵書林梓行

共



足就工作裨繕糧盡復出後以疾亡

伯重易師 青牛戶堂 遠播京洛

子止塗傍 潛道觀文 理素詠緗

須捷懸服 庸保索糧

### 寒貧

寒貧者姓石字德林安定人也建安初客三輔  
乃就學長安宿儒樂文博氏通詩書於衆輩中  
最爲玄靜關中洵亂南入漢中不治產業不畜  
妻孥晝夜誦詠道書後還長安獨居窮巷冬夏

弊衣連結里人與之衣食不取郡縣以其鰥寡  
給焉時乞於市亦不多取人問姓名不荅故因  
號之曰寒貧也車騎將軍郭淮以意氣呼之問  
所欲瞪而不言因與脯糒及衣取其脯一胸糒  
一升而已

德林玄默 範彼樂儒 塵業弗務

道典日披 寒貧致號 芳字莫知

戎臣問遺 取食却衣

孫登

孫登字公和汲郡共人也無家屬居郡北山窟  
土爲室夏則編草爲裳冬則被髮自覆好讀易  
撫琴性無恙怒見者皆親樂之時游邑都所經  
家或設衣食者一無所受嘗住宜陽山中文帝  
使阮籍往觀與語不應嵇康從游三年問其所  
圖終不荅康每嘆息將別以才多識寡戒之後  
不知所

公和弗偶

宜陽居穴

炎曦蔽草

寒暑被髮

文係虞絃

載鼓載閱

阮扣緘言

稽游戒別

董京

董京字威輦不知何郡人也初與隴西計吏俱  
至洛陽常宿白社中或乞於市被髮而行逍遙  
吟詠得殘碎繒絮結以自覆全帛佳綿棄而不  
受著作郎孫楚就社中與語載與俱歸復貽書  
勸之仕京詩以辭之後數年遁去莫知所之於  
其寢處唯有一石竹子及詩二篇而已

威輦飄踪

洛陽客至

潔栖幽社

污游囂市 達矣行吟 鄙哉言仕

倏焉遐舉 獨遺玄賦

夏統

夏統字仲御會稽永興人也幼孤貧養親以孝  
及聞每采梠求食星行夜歸或至海邊拘蠅蟻  
以資養雅善談論宗族勸之仕統悖然作色曰  
使統屬太平當與元凱評議遇濁代念與屈生  
齊潔若污隆之間自當耦耕沮溺豈有辱身屈  
意於郡府之間乎聞君之談不覺毛灑汗匝顏

赤心熱口張耳塞也言者大慙

統幼孤匱 孝睦則聞 采林星往

拘水海征 顯榮族勵 沮溺自任

歛形迤世 畢影高襟

郭文

郭文字文舉河內軹人也少愛山水尚嘉遯服  
畢不娶步擔入吳興大辟山窮谷倚木於樹苦  
覆而居恒著鹿裘葛巾不茹酒肉區種菽麥采  
竹實鹽以供餘杭令顧颺與葛洪共造之携與

俱歸颺贈韋袴褶一具文不納辭歸颺追遣使者置衣而去後衣爛戶內竟不服用王導聞其名遣船車迎之文荷擔而至居導西園温嘗問曰今將用先生以濟時若何文曰山草之人安能佐世後逃歸臨安既卒葛洪庾闡並為作傳贊頌其美云

郭父嘉尚

山水遐思

名鳥既歷

荒谷攸居

颺服弗御

導園暫栖

一朝捐瑟

二哲揚徽

### 郭翻

郭翻字長翔武昌人也翻少有志操辭州郡辟家於臨川以漁釣射獵不涉世交居貧無業欲墾荒田先立表題經年無主然後乃作至稻將熟有伊認者悉推與之縣令聞而給之以稻還翻翻竟不受其漁獵所得或從買者不取其直亦不告姓名嘗墜刀於水路人有為取者因遂與之路人固辭翻曰爾所不取我豈能得復沉刀於水其廉不受惠皆此類也

武昌翻里 臨川寄室 乃耕污萊  
禾成弗獲 乃鬻漁獵 售人無直  
沉器漣漪 允符清德

### 沈道虔

沈道虔吳興武康人也少好老易居縣北石山下與諸孤子弟共釜庾以捃拾自資同捃者爭穠道虔悉以所得與之爭者愧而後每事轍云勿令居士知冬無複衣戴顛聞而迎之周以錢服及還悉供諸衆無衣者鄉里少年相率受學

道虔無食以立學徒武康令孔恢之相與餽給受業者始得有成道虔年老菜食恒無經日之儲而琴書爲樂以終

道虔玄澹 老易研文 饑仰掇穠

寒鮮複衿 戴周贍族 孔給淑人

耄年藿食 琴典忻忻

### 孔淳之

孔淳之字彥深魯人也孔子二十六代孫性好墳籍山水爲太原王公所稱居會稽剡縣茅室

蓬戶庭草蕪徑牀上有書數帙而已與處士戴  
顥王弘之王敬弘等並爲人外之游又申之婚  
姻敬弘以女適淳之子尚遂以烏羊繫所乘車  
轅提壺爲禮至則盡歡共飲訖暮而歸或怪其  
若此荅曰固農夫田父之禮也會稽太守謝方  
明要之不至使謂曰苟不入吾郡何爲入吾郭  
淳之笑曰潜游者不識其水巢栖者非辨其林  
飛沉所至何問其主終不屑往元嘉初復徵爲  
散騎侍郎乃逃去家人莫知所在後東歸七年

卒

淳之屬懷

索丘山水

徑草芄芄

牀書楚楚

三星締姻

一壺成禮

郡招耻屈

帝徵遙徙

翟法賜

翟法賜者潯陽柴桑人也曾祖湯祖莊父矯並  
高尚不仕法賜結屋廬山以獸皮結草爲衣雖  
鄉親中表莫得見焉徵辟不就後其家人至石  
室尋求因復遠徙後卒于巖石之間

翟世清尚 法賜尤皎 栖秀餐靈

服毛御草 迺避敷求 復投杳渺

達人龍蛻 青巖陳殍

劉凝之

劉凝之字隱安南郡枝江人也慕老萊嚴子陵  
為人推家財與弟及兄子作舍野外非其力不  
食妻亦不慕榮華樂甘儉苦共乘薄笨車出市  
賣易周用臨川王義慶衡陽王義季遣使存問  
凝之荅書稱僕人或譏焉凝之曰昔老萊向楚

王稱僕嚴陵亦抗禮光武未聞巢許稱臣堯舜  
也荊州年譏義季慮其餒斃餉錢十萬凝之將  
錢至市門觀有饑色者悉分與之俄頃立盡自  
甘饑餓後攜妻子入衡山不返元嘉二十五年  
卒

白尚凝之 古逸自期 于宗謝業

于野爰居 哲媛同德 賢王抗儀

衡陽終隱 遂厥遁思

朱百年

朱百年會稽山陰人也家貧少有高志談玄屬  
詠携妻入會稽山業採以樵箬置道頭輟爲行  
人所取明日復然人稍怪之積久知是朱處士  
所賣湏者隨多寡留錢取樵箬而去或遇寒雪  
不售資匱自榜船送妻還孔氏天晴復迎之追  
念母氏亡於冬月衣無綿絮自此不御嘗寒時  
就孔顛宿衣被單袂顛以臥具覆之旣覺引臥  
具去體謂顛曰綿定竒温卽流涕悲慟顏峻爲  
東揚州餉穀三百斛不受百年卒蔡興宗爲會  
美之以比梁鴻妻云

百年玄藻

樵山自給

一日弗售

兼人無食

孝不御温

廉能卻物

淑妻辭饋

並彰清德

顧歡

顧歡字景怡吳郡鹽官人也家世寒賤父祖並  
爲農夫歡獨好學年六七歲知推六甲父使田  
中驅雀歡作黃雀賦而歸雀食稻過半父怒欲



捷之見賦乃止鄉中有學舍歡貧無以受業於  
壁舍後聽無遺亡者夕則然糠自照及長薦志  
不倦居剡中天台山每日出戶山鳥集其掌上  
取食年六十四卒

歡也農流 性資秀悟 年方岐嶷

推甲作賦 屬垣晝業 然糠宵度

機心永絕 山禽掌哺

### 吳蔡二隱

吳苞字懷德濮陽湮城人也學善三禮老莊過

江教授葛巾竹塵蔬食二十餘年與劉瓛俱於  
褚淵宅講授論語隆昌元年徵太學博士不就  
蔡蒼字休明陳留人也常慕苞清抗圭窬自守  
不與俗交李撫謂江敷曰古人稱安貧清白曰  
夷涅而不淄曰白如蔡休明者可不謂之夷白  
乎

懷德鉅儒 北學南師 徒揮宋組

鑰闡魯書 休明景式 高抗亦持

古稱夷白 撫頌不虛

徐伯珍

徐伯珍字文楚東陽太末人也少而孤貧學書無紙常以竹箭箬葉甘蕉及地上學書及長讀詠不倦妻亡不娶自比于曾參宅南九里有九巖山遂移居之家極貧窶而兄弟四人皆白首相對時人呼爲四皓前後徵辟凡十數皆不就

伯珍幼艱

抱影長嘯

藝翰摹精

古墳探奧

九巖逸栖

四人齊耄

自擬魯參

世稱商皓

沈麟士

沈麟士字雲禎吳興武康人也慧敏博學有高尚之心居貧織簾誦書口手不息鄉人號爲織簾先生又傭人伐竹以繼餽糜嘗苦無書因游都下歷觀四部畢乃嘆曰古人亦何人哉稱疾歸鄉無所營求負薪汲水并日而食守操終老徵薦不就著易禮老莊等要略數十卷於家

麟士俊敏

尚志窮居

誦口而畜

業手以需

討典都游

終履鄉歸

昭昭經述 來嗣足垂

沈顛

沈顛字處默幼清淨有至行慕黃叔度徐孺子之為家貧唯讀書著述獨處一室人罕見其面從叔勃貴顯還吳賓客填門顛獨不往勃就之顛迎送不踰閭勃嘆曰吾今乃知貴不如賤也齊末兵荒與家人同甘困餓二日一餐或饋梁肉閉門不受惟采蓴苕根供食以樵采自資怡然不改其樂

處默高步

憲穉欽風

守我冲寂

傲彼尊榮

饑戎並遘

糲膳皆空

山植溪毛

日舉以供

阮孝緒

阮孝緒字士宗陳留尉士人也孝緒七歲出繼從伯胤之胤之母周氏卒遺財百萬應歸孝緒孝緒一無所納盡以歸胤之姊琅邪王晏之母聞者嘆異性至孝既冠荅父彥之誠曰願跡赤松於瀛海追許由於窮谷庶保餘生以免塵累

自是屏居一室非定省未嘗出戶家貧無爨僮僕竊隣人墓樵繼火孝緒知之乃不食更令撤屋而炊所居唯竹一叢而已

卓哉士宗 年芳行偉 百萬推金

一廬甘餒 瀛海清踪 穎陽高軌

叢竹安愉 沒躬無悔

### 劉訐

劉訐字彥度平原人也數歲幼貧性不欲仕時有辟之者訐卽挂檄於樹而逃事息乃還亦不

願娶與陳留阮孝緒及族兄歆日夕招携都下謂之三隱卜築東澗有終焉之志每遭窘迫併日而食隆冬或無氊絮處之晏然人不覺其饑寒也常著縠皮巾披衲衣每遊山澤輒留忘返神理閑正姿貌甚華在林谷之間意氣彌遠天監七年卒謚曰玄貞處士

訐當齧紀 孤困卽遭 觀賓弗利

比友相招 東澗盤止 遠岫遊遨

玄貞清謚 千載猶昭

胡叟

胡叟者不知何許人也居家蒿室草徑唯酒自適嘗謂人曰我此生活似勝焦先不治產業饑貧不以爲耻養子字螟蛉以自給每至貴勝之門恒乘一犍牛布囊容三四升飲噉醉飽便盛餘肉併以付螟蛉見車馬榮華視之蔑如也

叟不家治

寔勝焦生

碧草寄趾

黃流適情

仰供養子

時乞華門

視彼榮富

太虛馳雲

范元琰

范元琰字伯珪吳郡錢唐人也少通經史兼精佛義居家不出城市雖獨居如對賓客見者莫不改容憚之家徒四壁唯以園蔬爲業縣令上言義行楊州刺史臨川王宏辟命不至卒于家

吳有元琰

敏求慧性

旣涉九經

復昭三乘

寂矣厭紛

儼乎居敬

藝蔬足老

終違辟命

朱桃椎

朱桃椎益州成都人也澹泊絕俗被裘曳索人莫能測長史竇軌見之遺以衣服鹿幘麕鞞逼署卿正委置不服更結廬山中夏則羸冬緝木皮葉以自蔽贈遺一無所受嘗織十芒屨置道上見者曰居士屨也爲鬻米茗易之置其處輒取去終不與人接高士廉爲長史備禮以請降階與之語不荅瞪視而去士廉拜曰祭酒其使我以無事治蜀耶屢遣存問輒走林草自慝云

桃椎恬閑

裘索陶熙

裕襟弗諒

世網苦縻

構雲取壯

緯草由願

友治請言

默示無爲

孟浩然

孟浩然襄陽人也骨貌淑清風神散朗灌蔬藝竹以全高尚然遊不爲利期以放性故常貧名不繼於選部聚不盈於擔石雖屢空不給而自若也郡守韓朝宗偕浩然入秦先揚於朝約日引謁及期會友文酒講好甚適或曰子與韓公預諾而怠之可乎浩然叱曰僕已飲矣身行樂

耳邊恤其它遂畢席不赴由是間罷終于冶城

南園

楚嶽降靈 孟哲挺生 林嘉遜尚

文妙匠心 放適情志 任率天真

臨觴負諾 樂豈易名

高繹

高繹者長安人也有古人絕行慶曆中召至京師上欲命官固辭歸山賜號曰安素處士家甚貧窶妻子寒餒終不以困故受鄉人饋遺閉門

讀書而已

高子勵行 卓犖邁古 德聞帝擢

號錫山處 室用雖艱 鄉周弗取

唯勤遜志 披文暢喜

杜生

杜生者莫知其名時人呼為杜五郎穎昌人也所居去邑三十里有屋兩間與子並居前有空地丈餘即為籬門生不出門者三十年黎陽尉張軫往訪之自陳村人無能公何見顧軫問所

貧士傳 卷之十  
以為生對曰昔有阪田與兄同耕迨兄子娶婦  
度不足贍乃盡以與兄而携妻子至此僦屋居  
之與人擇吉醫藥聊以飢粥有時不繼云

杜生野寄 逾紀潛門 讓畝敦睦

假室裕貧 嚴卜韓方 以粒以薪

孫尉惠綏 聆厥條陳

### 俞澹

俞澹字清老金華人也貧而無室栖山以居人  
呼之曰半山道人荆公王介甫嘉其潔尚乃強

為釋牛山以資澹曰無錢得祠部耳公為買之  
牒名紫琳已戒期祝髮愆而不至公訝詰之澹  
曰吾思僧不易為生龜脫殼亦難堪忍祠部已  
送酒家償負矣

清老放達 風神塵表 麗偶弗偕

芳林孤蹈 名公致嘉 迦業強造

曠性不堪 從厥所好

### 賈收

賈收字耘老烏程人也以詩著名喜飲酒家素



貧東坡先生每念之嘗作古木怪石書其後以贈云念賈處士貧甚無以慰其意爲作古木怪石一帋每遇饑時輒一開看飽人否若吳興有好事能爲君月致米三石酒三斗終君之世者當便以贈之不爾可令侍姬掌貯湏添丁長以付之也

賈生茂士

握槩吐珠

綠醕則嗜

白衣罕携

室當交謫

友寔致思

嘉圖雖慰

玩豈忘饑

### 丁時習

丁時習字行可邵武人也父廷彥爲太學錄以忤蔡攸辭歸卒時習遂棄青紫業僦舍掩籬玩讀經史宴如也鄉朝貴有以書薦於有司終不往謁妻危氏同甘苦未嘗以貧窘見辭色子百之千之夙興供洒掃具蔬食畢卽受業恭謹終日杜來爲之立傳

廷彥邦直

克陶哲器

國止青蠅

園藏白賁

命妻刑德

翼子繩義

藝士昭揚 播芳百嗣

蘇雲卿

蘇雲卿者豫章南昌人也初與丞相張德遠爲友宋旣南渡德遠貴顯雲卿乃遜迹結庵于東湖之小洲家貧畚礫爲圃織履以自給垂三十年後德遠復相函金帛移書帥府云有故人蘇雲卿在治下斯人管樂流亞非折簡可招必禮致之帥漕乃以計造見翌日遣吏迎候書幣不啓而雲卿已遜矣

雲卿國彥 乃丁世亂 故交達顯

湖洲遲玩 管樂致忻 幣書臻荐

松間一語 明發遐窟

蘇扶

蘇扶者隱士蘇庠仲子也工詩善書貧甚而有介郡守招之語子姪輩曰吾何以獲知時人特以先世隱名存耳殆不過哀吾貧而周之寧忍以父名賣錢耶固辭不往死至無以殮葬云

庠叟用晦 逸範夙傳 乃生麟角

亦尚龍潛 歌彰清蘊 書適熙天  
抱窮以沒 題轉弗全

### 何溥

何溥字商霖永嘉人也潤澤詳整屬詩知名金  
爨常空而意趣悠然漠不爲累也葉水心嘗稱  
其凍餓自守之樂死之日殯具無貲其友翁忱  
率素往來者葬之

溥也哲儒 聖步賢趨 玉堪擬德

隅寔彰儀 躬遭育鞠 心嗜道腴

獻稱有試 友殯無歸

### 周方叔

周方叔字矩道居丹徒築室五州山下讀誦不  
休家貧或終日不得食鄰僧乞米送之一日龔  
農卿渠孫常州吳會造其廬無以爲具乃烹畜  
犬食之二公忻然盡歡嘆息而去

矩道崑廬 考墳自娛 如何檀施

乃繼儒糜 朝軒有造 山釜無儲

羹獻作饌 式宴樂胥

呂徽之

呂徽之天台人也居萬山中綜博述詠安貧逃  
名常漁以自給一日携幣楮請富家易穀露頂  
短褐布襪草屨值大雪立門下人弗之顧徐至  
庭前聞閣中諸貴遊子弟詠雪苦吟弗就徽之  
哂焉迺出侮之徽之口占以荅無不精美問其  
姓字終不言諸子弟曰嘗聞吾鄉有呂處士者  
欲一見而不能先生豈其人耶曰我農家安知  
呂處士因惠之穀徽之怒曰不義之貨我何庸

取遂去諸子弟矚識其所雪霽覓訪惟草屋壁  
立忽失桶內有人乃徽之妻也以天寒無衣坐  
爲障耳因問先生何在荅曰溪上捕魚乃至彼  
見之徽之隔溪謂曰少需之得魚當易酒飲諸  
公也俄頃携魚酒至盡歡散別翌旦復躡其蹤  
則徽之已行矣

作者徽之

絕塵不羈

益耒出耨

離罟浦漁

遁趾一出

僻牖人知

諸少甫扣

孤雲復移

胡汲仲

胡汲仲字長孺天台人也特立獨行凍餓有守趙子昂嘗爲羅司徒奉鈔百錠請作墓銘長孺怒曰我豈爲宦官墓譽耶是日長孺絕糧其子以情白坐上諸客咸勸之受長孺卻愈堅嘗送蔡如愚歸東陽云麋不繼糗不溫謳吟猶是鍾球鳴語之曰此余秘密藏中休糧方也

夷風沿濁

卓生長孺

復有確守

困無纖累

雖當粒絕

終辭墓譽

歸又贈言

堅哉見志

杜有開

杜有開字伯陽江陰人也家貧授徒以給妻吳緝纊助之天曆歲歉學徒散去吳之弟繼勸有開鬻墓地少延餒死有開在羸憊中堅持不可繼欲挈吳歸吳曰夫能盡孝吾獨不能盡婦道乎遂相繼枕籍死鄉人憐之

伯陽儒碩

庾炊莫給

養蒙而需

載績以易

孔鞠饑災

克全守德

子經婦義 斃焉弗失

張介福

張介福字子棋覃懷人也從姑氏來吳少慕鄉  
哲許衡遂軒軒以禮自持為學誠篤周旋規矩  
張士誠入吳兵掠其舍令導諸富不從乃刃其  
面流血仆地復戴冠危坐而顏色自若家素貧  
窶冬不具衣襦或遺以袂絮固辭之雖小物亦  
不受及死語人曰吾學古人一無所成死有餘  
憾矣

覃懷秀產

吳邑卽旅

志在希賢

動能中禮

白刃莫懼

素介無取

生雖聞道

沒猶含悔

王達

王達字志道錢塘人也足一跛家極貧無以朝  
夕因賣藥賣藥復不繼又市卜博究子史百家  
客至輒談今古不休人知其辨博每以疑難質  
之無不口應

跛者王生

外款內足

山袖秦方

市簾楚卜 學必窮年 談淮稽牘

與義隱詞 質皆彰暴

王賓

王賓字仲光吳郡人也志不願仕永樂中自壞其面終身獨居無妻子髻髻布袍游行市中家貧無業賣藥以資所至羣兒隨焉郡守姚善枉謁衡門賓據坐受拜以道誨之若師弟子姚少師廣孝貴歸來訪弗肯見方盥掩面走

仲光耽隱 獨影窮栖 毀顏佯廢

編髮高嬉 性偕赤子 道屈貴輿

同邦企德 展矣我師

邢量

邢量字用禮吳郡人也平生不娶併童僕無之弊屋三間青苔滿壁室中唯左右古書披覽薪水躬自秉執日惟炊黍分而食焉未嘗得一煖食折鐺敗席壞麻破被蕭然其居也及扣之經史傳記無弗應者客至清談不設湯茗有奇彥數人每謁之必挾錢以往午則買食它處復就

談焉量以是黑老

邢叟好古 經紬史究 室乏御令

身勞井臼 晨炊昏餐 暑麻寒覆

問奇有來 如鍾在扣





